

10. januar 2006

UKIU 2006/11

Inatsisissatut siunnersuummut oqaaseqaatit

Oqaaseqaatit nalinginnaasut

Inatsisissatut siunnersuutip tunngavia:

Umiarsualivimmiinnermut akileraarutit allanngortillugit Inatsisartut 2002-mi upernaakkut ataatsimiinnerminni aalajangiuppaat, umiarsuit takornarianik angallassissutit usisinnaassusiat naapertorlugu akileraarut ilaasunik angallassinermut akileraarummik taarserneqassasoq, tassa umiarsuit takornarianik angallassissutit Kalaallit Nunaanni umiarsualivimmut nunalittut, piffimmilu umiarsualiviup avataani kisartut imaluunniit ilaasunik sinerissamut nunnigussisut umiarsuarmini takornarianik angallassissumi ilaasumut ataatsimut akileraarummik 300 kr.-iusumik ulloq 1. januar 2003 aallarnerfigalugu akiliisalersussanngorlugit.

Akileraarummik allanngortitsinerup ilaatigut kingunerisimavaa umiarsuit takornarianik angallassissutit Kalaallit Nunaanni umiarsualiviit siusinnerusumut sanilliullugu annertunerusumik nunaliffigisalersimagaat, tassami umiarsuit takornarianik angallassissutit ilaasunik angallassinermani akileraarut umiarsuup takornarianik angallassissutip angallassinermani umiarsualivimmut ataatsimut arlaqartunulluunniit nunalinnera apeqqutaatinnagu akileraarut taannaaginnarmat. Tamatumalu kingunerivaa nunami niuertarfinnut niuertunullu iluaqutaasumik kaaviiartitaqarnerulerneq.

Kaaviiartitat takornariaqarnermillu isertitat amerlisarniarlugit, tassuunakkullu aamma aningaasatigut namminerisamik napatinnerulernissaq suleqataaffigiumallugu Greenland Tourism, Inuussutissarsiornermut, Nunalerinnermut Suliffeqarnermullu Pisortaqaarfik aamma Akileraartarnermut Pisortaqaarfik suleqatigiinnermik aallartitsisimapput, tassa ilaatigut maannakkut takornariatitseriaatsip ineriartortinneqarsinnaaneranut aamma takornariatitseriaatsinik nutaanik ineriartortitsinissamut periarfissat allat suunerinik naliliinissaq siunertaralugu.

Suleqatigiit tassunga atatillugu naliliisimapput umiarsuit takornarianik angallassissutit ilaasunik angallassinermanut akileraarut umiarsuarmini takornarianik angallassissummi ilaasumut ataatsimut 150 kr.-inik qaffanneqarsinnaasoq, umiarsuit takornarianik angallassissutit siunissami nunalittartussat amerlinissaannik naatsorsuutigisamut sunniuteqanngikkaluartumik. Umiarsuimmi takornarianik angallassissutit atorlugit takornariatitsisarnermi ilaasorineqarnerusarput inuit akissaqarluinnartut, aki isiginiarpallaarnagu misigisaqarnissaminnik pingaarnerutitaqartut. Tassunga atatillugu ilaasunut angallassinermani akileraarut akimut tamarmiusumut sanilliulluni annikitsuararsuuvoq.

Kiisalu siunnersuutigineqarpoq ilaasunut Danmarkimiit, Savalimmiuniit nunanilluunniit allaniit aallartittumik angalanissatut aaqqissuussamut atatillugu umiarsuakkut timmisartukkullu angalanissamut billetsimik pisisunut akileraarummik taamaattumik atuutilersitsinissaq, tassa umiarsuaq ilaasunik angallassissut ilaasunik nalinginnaasunik takornarianillu ilaasoqarluni ingerlaartuuppat. Siunnersuut taanna aningaasarsianit akileraarutit pillugit Inatsisartut inatsisaata allanngortinneqarneranik siunnersuummut attuumassuteqarpoq (umiarsuarni inuttat akissarsiaasa akileraarutitaat pillugit aaqqissuussinermut).

Inatsisissatut siunnersuutip imarisai:

Inatsisissatut siunnersuutip ullormit 1. april 2006-imiit kingunerissavai umiarsuit takornarianik angallassissutit ilaasunik angallassinerrannut akileraarutip, umiarsuarmi takornarianik angallassissummi ilaasumut ataatsimut 300 kr.-iniit 450 kr.-inut qaffanneqarnissaa kiisalu ilaasunut Danmarkimiit, Savalimmiuniit nunanilluunniit allaniit aallartittumik timmisartukkut umiarsuakkullu angalanissatut aaqqissuussanut peqataasunut akileraarummik ilaasumut ataatsimut taamatulli 450 kr.-imik atuutilersitsinissaq.

Pisortanut aningaasatigut allaffissornikkullu sunniutissai:

Umiarsuit takornarianik angallassissutit ilaasorisartagaasa amerlassusii 2003-mi 9.500-niit 2004-mi 15.600-t missinginut amerleriarsimapput. Tuniniaasartut takornariaqarnermillu inuussutissarsiuteqartut annerit paasissutissiissutaat tunngavigalugit eqqoriarneqarpoq umiarsuarni takornarianik angallassissutini ilaasut 2006-imi tikittussat amerlassusissaat ikinnerpaamik 2004-misuulli amerlassuseqassasut, ilimagineqarsinnaasorli 20.000-it pallissagaat. Ilaasut Danmarkimiit, Savalimmiuniit nunanilluunniit allaniit aallartittumik angalanissatut aaqqissuussanut 2006-imi peqataajumaartussat 3.000-it missaanniissangatinneqarput.

Taamaattumik inatsisissatut siunnersuutip Landskarsip isertitassanut ukiumut 4,3 mio. kr.-it missinginik amerlissutaanissaa naatsorsuutigineqarpoq.

Inuussutissarsiutinik ingerlataqartunut aningaasatigut allaffissornikkullu sunniutissai:

Inatsisissatut siunnersuut inuussutissarsiutinik ingerlataqartunut aningaasatigut allaffissornikkulluunniit sunniuteqartussaannilaq.

Avatangiisinut pinngortitamullu sunniutissai:

Inatsisissatut siunnersuut avatangiisinut pinngortitamulluunniit sunniuteqartussaannilaq.

Innuttaasunut allaffissornikkut sunniutissai:

Inatsisissatut siunnersuut innuttaasunut allaffissornikkut sunniuteqartussaangilaq.

Naalagaaffeqatigiinnermut namminersornermullu tunngasut:

Inatsisissatut siunnersuut naalagaaffeqatigiinnermut tunngasunik imaqaangilaq, kisianni Kalaallit Nunaata aningaasatigut namminerisamik napatissinnaalernissaanik pilersitsinissamut pitsaasunik sunniuteqataaassaaq.

Pisortatut oqartussaasunik kattuffinnillu tusarniaaneq:

Inatsisissatut siunnersuut Aningaasaqarnermut Pisortaqaarfimmut, Ineqarnermut Attaveqaqatigiinnermullu Pisortaqaarfimmut, Inuussutissarsiornermut, Nunalerinnermut Suliffeqarnermullu Pisortaqaarfimmut, Greenland Tourism-imut aamma KANUKOKA-mut tusarniaassutigalugu nassiunneqarnikuuvoq, taakkulu inatsisissatut siunnersuummut oqaaseqaatissaqarsimangillat.

Tusarniaanermut akissutit Akileraartarnermut Akitsuusiisarnermullu Ataatsimiititaliamut nassiunneqarnikuupput siunnersuummulli allannguutissaqartitsisimanatik.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Umiarsuarni ilaasunik angallassissutini ilaasunik nalinginnaasunik takornarianillu ilaasoqarlutik ingerlaartuni ilaasumut ataatsimut akileraarummik 450 kr.-iusumik atuutilersitsinissaq siunnersuutaavoq, tassa ilaasut Danmarkimiit, Savalimmiuniit nunanilluunniit allaniit aallartittumik timmisartukkut umiarsuakkullu angalanissatut aaqqissuussanut peqataappata.

Ilaasunik nalinginnaasunik takornarianillu ilaasoqarluni ingerlaarneq tassaavoq ilaasunik Danmarkimiit, Savalimmiuniit nunanilluunniit allaniit aallartittumik angalanissatut aaqqissuussamut atatillugu timmisartukkut umiarsuakkullu angalanissamut billetsimik pisisimasunik ilaasoqarluni, aammalu umiarsuarmi inissaqartillugu ilaasunut Kalaallit Nunaata iluani angallanneqartussanut billetsinik

neqerooruteqarfiusumik ingerlaarneq. Taassuma nassuiaataa, Aningaasarsianit akileraarutit pillugit Inatsisartut inatsisissaattut siunnersuummi, UKIU 2006/10 -mi § 34 b, imm. 2 –mi pineqartup assigaa.

Nr. 2-mut

Umiarsuit takornarianik angallassissutit ilaasunik angallassinerrannut akileraarutit 150 kr.-inik qaffallugu ilaasumut ataatsimut 450 kr.-inngortinneqarnissaa siunnersuutigineqarpoq. Inatsisissatut siunnersuummi nalinginnaasumik oqaaseqaatit innersuussutigineqarput.

Nr. 3-mut

Imm. 2-mi aalajangersagaasumit allaasumik akileraarutit akiliuteqartarnissaq pillugu Akileraartarnermut Pisortaqqarfimmut isumaqatigiissuteqartoqarsinnaanerata aammattaaq umiarsuarnut ilaasunik angallassissutinut, ilaasunik nalinginnaasunik takornarianillu ilaasoqarlutik ingerlaartunut atuutitinneqarsinnaanissaa siunnersuutaavoq.

§ 2-mut

Inatsisip ullormit 1. april 2006-imiit atortuulernissaa siunnersuutigineqarpoq.